

SOCIAZIONI

L'è sun desch l'Almanach 2019, siede curiousc?

La neva publicazion de l'Union di Ladins de Fascia vegnarà prejentèda a la radunanza generèla en sabeda ai 7 de mèrz da les 16.30 a La Gran Ciasa a Soraga

L'è sun desche ence l'otavo numer de l'Almanach. L cognoscedè? Chesta publicazion, metuda ensema da l'Union di Ladins de Fascia, è nasciuda del 2012 e da enlouta ogne an la ge è stata sporta ai sozi e ai aboné de La Usc di Ladins.

«Se ch'est codejel troarà vosc aprijiamet jiron inant con ch'est projet e l'Almanach de l'Union di Ladins de Fascia podarà ve compagnèr ence ti egn che vegn», coscita troon scrit sul prum numer del 2012. L'aprijiamet l'è stat tant gran che l'Union di Ladins à decidù de jir inant.

Te chisc ot egn l'è sozedù n muie de robes, l'è stat fac e avenimenc che à tocià nesc pajes e noscia jent, de chi bie ma ence de chi manco bie. Con l'Almanach aon volù i binèr ensema e i documentèr percheche ch'esta revista sie na sort de testimonianza e de memoria storica.

Del 2012 tacane via con la pruma doudesc patofies de Manuel Riz che a na vida ironica e pizochenta tachèa ite a dessegnèr i fac più

emportanc sozedui meis per meis. Chesta sort de vignetes à abù da sobito dassen n bel suzess tant che la colaborazion con l'artist Manuel è jita inant duc i egn. Con sia caricatures l ne met dant sia vijion de chel che che sozede te Fascia e che che fèsc noscia jent, noscia sociazions, nesc politics e nesc raprejentanc. A outes ence jan a tocèr la cordes più sotiles e personèles, ma mai con chela de ofener.

Ensema a la patofies de Riz te chisc egn l'è stat publicà ogne an ence la «Piroles», n picol promemoria di fac sozedui via per l'an, che vegn documentà ence su La Usc di Ladins, e la biografia en curt de 12 personages de la valèdes ladines che à lascià sia pedies. Sun vèlch numer se pel troèr ence l Zodiach con la descrizion e la carateristiches de ogne segn. Ma l'Almanach l'è ence n muie de auter.

L'Almanach: ogne an n argoment desvalif

Apede a la pates tradizionèles ogne an l'è stat cernù n argoment particulèr



La soracuerta del nef Almanach 2019.

da svilupèr tras la colaborazion de desvaliva jent, gropes e istituzions.

Su l'Almanach del 2012 l'è stat publicà 12 rezetes de cojina de gra al didament de 12 chef cognosciui de Fascia, del 2013 l'è stat metù dant 12 sorts desvalives de èlbres che troon sun nesc tegnir con la colaborazion del president de l'Union di Ladins Fernando Brunel che, descheche se sà, l va de spes a fèr raides sa mont e bolentiera l'è metù a la leta retrac e saeres sun ch'est argoment.

Del 2014 l'Union di Ladins à domanà la colaborazion del fotograf Alberto Chiochetti da Moena per la publicazion de 12 sort desvalives de fiores con foto e descrizion; del 2015 enzeve la colaborazion è stata sporta da l'espert de erbes e plantes da medejina Marco Detomas da

Vich che ne à metù a la leta si consees de co durèr ch'esta piantes per se medejinèr enstesc a na vida naturèla.

Su l'Almanach del 2016 l'è stat publicà i ortames de gra al didament de la firma Soreie de Sèn Jan che li coltiva ti orc e ciampes de la val. L'an dò se è passè enzeve a ge dèr na veièda a la besties e en particulèr ai ucie de gra a la colaborazion de la Scola Ladina de Fascia con sie grop de studenc che fèsc robotica Gome Neve. Vidè dal professor Thomas Zulian i ne à metù a la leta i resultac de n studie sui ucie che vif te nesc teritorie da mont.

La colaborazion percacenta con la Scola Ladina è jita inant ence per la ultima edizioni de l'Almanach: del 2018 l'è stat cernù de publichèr i strumenc musicai, i dessegnes è stac fac dai studenc de la Scola d'èrt



I numeres de l'Almanach vegnui fora ti egn passè.

con sia insegnanta Lara Steffe e la descriziions è states metudes ensema dai insegnanc de la Scola de musega Il Pentagramma de Fascia e Fiem. E ruon coscita a l'ultim numer del 2019 olache troarede 12 desvaliva sorts de sieves dessegnèdes dai studenc de la Scola d'èrt col coordinament del professor Franco Ghetta.

De più no ve dijon, ve speton a la prejentazion che sarà en sabeda ai 7 de mèrz da les 16.30 a La Gran Ciasa a Soraga en ocajion de la radunanza generèla. Te ch'esta ocajion vegnarà portà dant ence la relazion e l bilanz 2019 de la sociazion e i sozi podarà renovèr l tesserament o l'abonament a La Usc di Ladins. E se tor la neva edizion de l'Almanach 2019 o vèlch numer di egn passè per aer duta la colezion!

MCI